

四庫全書

集部

欽定四庫全書

集部

元詩選三集卷六

七

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣馬啟泰

謄錄監生臣楊開泰

欽定四庫全書

元詩選三集卷六

庶吉士顧嗣立編

李序綱緼集

序字仲倫東陽人適菴先生惠之姪也善詩文
年十七追和李賀樂府嘗遊京師學士宋瑩左
丞危素輩見其所著四書新說引為莫逆交左
丞許有壬言於中書牒江浙行省俾為學校官
未用而省遇火牒亦隨燬序歎曰命也夫遂絕

意仕進歸隱東白山中與友人陳樵日相吟咏
以自樂所著有網緼集今讀其武皇仙露曲歎
金烏行銅雀臺磚硯歌諸作氣韻詞調雜諸昌
谷集中亦咄咄逼真也

暮行大堤上

暮行大堤上明月天上來但能照歡樂不解憐悲哀誰
家少年子大宅高樓臺涼風管絃發夜飲攜金壘寧知
飯牛客鬱鬱心如灰歡娛豈終極屈辱俱雄才徘徊望

明月惆悵何由裁

青雲兩黃鵠

青雲兩黃鵠雙飛起南極翱翔闔闔風直上太行北和
鳴忽棄背中路不相得長言生死同胡為自持擊天風
高四方母乃傷羽翼丹穴有鳳凰為君變顏色

都門道

清晨出南陌平旦下城闌東風微淡蕩草木一何新鬱
鬱遊子情祁祁女如雲翩翩桃花馬輓輓翠車輪娟娟

珠簾下娉娉看行人回眸不相見
搖動陌上春豈不頻見之匪我所思
存所思在遠道感激難重陳願為雙飛
燕南北長與親雲霞不相隔飛越復經秦

明月

明月入高樓流光何漫漫佳人一寸心
千里如素練浮光玉露起華渚浮雲散
光輝長若斯君心不相見

遠愁曲

桃杏忽已殘穠華逐流水綠階日色重
芳草青靡靡飛

燕銜落花春風共吹起飄散不相知愁心滿千里

武皇仙露曲

甘泉照月如鈞天千門萬戶生碧烟
碧天無雲露盤出明河夜拂金童仙
栖鴉起啼曲城曉大官步進青龍道
崑山玉盡武皇老茂陵春風吹綠草
魏人車馬東方來一朝秋燐飛空臺
天荒地老骨亦摧三川白日聞春雷
蕙花蘭葉參差起微月斜明光泥泥
泥仙人之淚猶泚泚

曲江芙蓉歌

綠波天矯如龍尾河漢英英拂雲起紫雲樓下花映人
搖蕩香風十餘里妖魂照夜春欲語白玉容華舊絲縷
秦川望月錦繡紋桂揖蘭舟鳳簫女紫雲頭上飛鳥過
朱蘭半折空嗟我怨紅落粉生微波芳華欲攬愁不歌
雲裳綺袂風露多

嗽金鳥行

昆明使者南方來洛陽宮闕如雲開玉階奉進嗽金鳥
水晶鏤刻辟寒臺錯金為屑玉為餌神刀取腦白龜死

美人自搗明月珠赤玉盤中光靡靡雲高夜啓月當戶
展翼垂吭為君吐白鸞之尾掃成堆瑟瑟輕黃如粉蠹
冶烟五色何氤氲後宮獨賜承恩人雕成宛轉合歡釧
一尺春風袖中軟不知南國江水深鐵箕已盡愁人心
岸傍沙隴高百尺賣兒買得雲南金安得羣飛萬千羽
不食珠璣食禾黍嘔出肝腸奉明主天下黃金賤如土
網繆曲送都彥良

天南翔鴈鳴離離城頭旭日光瞳矐長眉公子綢繆客

騎馬乘冰上南陌馬蹄翩翩幾千里江漢水暖遊雙鯉
東風不惜天上春拂柳吹花為君喜綺屏桂燭開洞房
暖紅霏霏明月香三星綽約正當戶流輝照見雙鸞凰
鸞凰不惜雙飛翼天上神仙遠相憶

次韻納齋銅雀臺磚硯歌

銅雀臺傾見荒土月黑妖狐上臺舞千年瓊甌墮人間
瑟瑟苔花暗秋雨天荒地老奈愁何臺上清泥生碧莎
斜風吹雨啼蟋蟀此是西陵長夜歌魏人膏血今已古

漆色凝花人未覩一從為硯今幾年漳水滔滔自東去
為君寫作銅臺吟臺前瓦礫猶傷心

和胡景雲白玉心黃金淚二歌

我有堅白心凝作方寸璧與君交結終不移都邑連城
不能易守靈童子無纖瑕十年琢削如蓮花金鈴珠帶
互天矯中有七竅流精華置之靈臺縞如雪相思一夜
虹光發美人千里共月明直上秋天貫明月飛神出入
洞八荒璆琳為衣璫為裳光輝照子丹元府崑山石爛

無相忘憶君更有和氏目千載推之置君腹

長相思天一方仰天望明月流淚何浪浪西方白帝金
為質賜我瞳人外如漆酸心烈烈不可支火起靈臺鑄
成液為君灑向別時衣一彈雙指如星飛為君寫作加
餐字千載光輝猶不死古來結交須黃金眼中流出交
更深斑斑痕迹明鏡小鏡中照我相思心明珠只買蛾
眉女空使詩人淚如雨

獨漉篇有所贈

獨漉復獨漉，隔簾月影望微月。
樓頭夜語不分明，碧穗開香似雲葉。
蜻蜓天上來，春愁立死錦繡堆。
豈知身是秋風客，為君容顏瘦如石。
芳菲相望采不及，千里黃雲覆沙磧。
背人去幾日，還曾飲江南水。
莫向燕支山汀洲，三月柳風起。
願得秋來渡江水。

大堤曲

野塘鷓鴣暖，水藻生桂葉。
莫上大堤行，拂人飛蛺蝶。
門前弱柳長紛紛，水花漠漠飛雲暖。
雲柔條自有烟露色，不

如愁死堤上人劉郎肉薄愁心重天上離鸞思別鳳春
風搖蕩本無根種得桃花繞新夢

山鬼篇贈姜厯山

山中鬼不獨山中亦城市衣中環珮無玉聲直入人家
弄書史小冠班文剪湘竹越衣芟製如流水玉壺未竭
歌未終飄若空中野雲起門前月色夜茫茫門外秋風
滿千里朝餐松柏露暮食蘭蕙花隴頭青桂樹何處是
君家

烏傷行

頭白烏畢逋尾爾焉知作墳送人死天公遣爾役孝子
頭白烏天上來口中流血不自惜却憐孝子心肝摧鴉
鴉夜宿墳邊樹飛向山頭啄泥土新墳磊磊三尺高銜
得黃泥如返哺秦人洄水築山靈飛烏為作顏氏塋顏
氏子國有祀烏作墳秦無人

雲松巢歌贈陳國賓

媯公子碧烟裏薜蘿引作魚鱗衣衣上清風如流水雲

為宇松為牆綢繆牖戶碧縷香翠華之幄青瑤璫亂髮
鬱鬱煥紫光十年不出生文章手板蒼蚪上風雨蓬萊
山中木天下

崑崙山牧童歌

崑崙丘雲上頭河西之子牧羴牛野田蓬萊牛不食直
上崑崙幾千尺凌網緼上崑崙牛背上弄碧雲羴牛努
角旁無人與雲同入天之門天門高高向西極月華爛
爛飛五色雲間夜食明月光身上爛弒虎文碧崑崙鬱

嵯峨中高四下流
黃河黃河水
流東入海
牧人自唱蓬萊歌
神刀斷截
犛牛尾
析木津
頭獻天子

雲莊歌贈雲莊左丞

天上雲何方
來天之元氣
出變化
飛龍與爾相徘徊
龍飛不自行
乘雲如水高
飛騰逶迤縹緲不可名
翺翔矯矯遊太清
出紫微
過箕尾
龍行亦行止
亦止與龍一心
青天裏
青天皎皎日正中
輪囷蕭索飛溶溶
春風浩蕩吹八極
氤氲五氣流
春風忽然收
卷不留迹
妙入無門

閔玄極冥冥宿神所宅獨有飛龍可以識房山之上
有屋名雲莊青壁突兀間棟梁雲兮雲兮不可以斂藏
散為甘雨澤四方年豐黍稻多穰穰雲在天人樂康

七夕謠

明河之水流玉雲神鳥為梁貫天津河西織雲天帝子
今夕東行見河鼓瑤光如笑橫碧渚微風徘徊自成舞
風參差夜逶迤願回六龍駐不飛明星漸出明月底珊
珊靈雨隨車飛

槐蟲吟

槐蟲復槐蟲高槐鬱鬱如青龍
枝葉葉被爾食青雲蕭瑟生秋風
槐蟲肥枝上垂一枝搖曳勢欲絕
欲墮不墮風淒淒下有車轍交馬蹄
不可墮地身為泥閨中女兒莫近之
令爾肌肉生瘡癢

敬次叔父適菴先生六觀圖韻六首

曉起初褰薜荔裳
隔簾皓影雜紅光
雪花映日孤峯起
玉柱浮空千尺長
風急露華都是霰
石寒芝草不生芳

朝暎正似丹砂色照耀雲間白玉牀

兩岸汀洲一浦分隔簾啼鳥近相聞
逶迤綠水遶春色
窈窕東風交浪紋杜若沙中香漠漠
蘼蕪烟暖翠紛紛
靈源不記東西路千樹桃花日又曛

山下泉鳴似殷雷山前倒影射崔嵬
斜陽迢遞天邊去
暮色蒼茫溪上來青壁高懸西若木
丹崖半長夜明苔
何時落日都門道照見東城陌上埃

亭前月色散斜曛林外灘聲隔岸聞
碧浪有烟渾似雪

青天如水不生雲風吹白露千崖聳秋映銀河兩派分
吹斷紫簫聞鶴過空中疑是玉宸君

蒙茸高壁踞山梁流彩霏霏似慧長玉氣氤氲春日暖
翠華縹緲白雲香陽坡十里橫烟樹陰壑千尋長露簞
坐向梧桐晞綠髮采芳自葺薜蘿裳

在淵靈物或飛天禱雨何須叩祝蜒千尺白虹晴飲澗
半巖蒼樹晝迷烟鴈山雲冷留飛錫匡阜詩成憶謫仙
自昔南遊看不厭歸來欲寫作圖懸

李裕中行齋橐

裕字公饒東陽人嘗從白雲先生許謙遊至治
間詣闕上聖德頌元英宗召見玉德殿補國子
生至順元年庚午舉進士授陳州同知轉道州
推官所著有中行齋橐公饒詩篇秀麗尤工七
言樂府出入二李之間與宋顯夫楊仲禮陳居
采諸公唱和惜全集失傳所存僅什之一二云

擬古

今晨攬衣起及此春禽鳴東風漸微和草木亦已榮
矯首懷所思所思傷我情不如且命酒真宰殊冥冥

中秋

待月灤水上天寒月無魄重雲委城隅秋色連徑白
北鄰有嫠婦南鄰足愁客昏燈照夢魂風雨滿沙磧

夜行烏桓道

夜行烏桓道風寒野氣白橐駝駕輕車怒項不肯發
馬嘶欲人立令我監毛髮四山無居人明月照積雪時方

甲兵收未乾新戰血況乃多盜賊白晝聞殺越平生所
經地憂虞轉惟怯我行豈不遲心傷望京闕

陽臺引

陽臺張讌日將夕長風吹秋欲無色燕丹奉酒荆卿歌
於期感激動毛髮酒闌拂劍憑凌起當筵直立相睥睨
髑髏青血凝冷光西入咸陽五千里白虹貫日日不死
祖龍猶是秦天子人間遺恨獨荒涼嫋嫋哀聲流易水

秋千詞

晴光幾日飄遊絲幽牕小影含綠姿衛娘新畫雙蛾淺
笑覓秋千下平苑長繩裊碧垂垂動盤桓寶髻搖金鳳
華纓雜佩迎緒風越羅半曳春烟重紫燕驚飛翠鸞立
行雲欲墜柳花濕盈盈嬌粉膩中紅暖玉團香春一色
穠芳如夢秦蘅老牆陰榆莢青錢少整衣重起為君壽
海澗河清鎮相守

題太真上馬圖

驪山複道凌紫烟雲猶翠花晴拂天君王先乘照夜白

龍光射日金迴旋太真猶凭花韜立思入遙情迷曙色
暖香滯態嬌若雲爛漫春風扶不得楊花紫楹定誰主
蜀道漁陽總塵土人間千古恨丹青回首開元淚如雨

次祭酒虞伯生先生壁間韻

八月一日灤河濱西風白草長如人城烏未棲角未起
落日砧杵連北隣砧聲砧聲一何急露寒孀婦抱衣泣
行人獨向明月中望斷星河夜深立

洛陽路

劉郎騎馬出南陌陌上桃花迷馬色夢逐遊絲看春日
一夜東風杏花白欲歸不歸思故鄉燕女緩帶雙鴛鴦
明朝別轡向何處旭日晴烟洛陽路

贈人歸江西

春深瓊島輕陰碧翠殿瑤階甃文石貂蟬侍中曉傳詔
殿頭急宣供奉入玉音春暖珠琅琅金篋屈折盤龍香
十年珥筆向左掖錦衣白日歸故鄉故鄉歸去隔江水
江上蘼蕪一千里短楫紅船載燕女少婦深閨怨遊子

江頭風急楊花飛鷓鴣暮雨烟中啼

休日燕太平園聽胡琴歌

朱絲玉璽駕鸞絃花桐刻螭麟革鮮蚪鬚分紫連楚篠
小佩歲裂雲殿曉女夷鼓歌弄天河暖風墜露春婆娑
天馬嘶烟不知處武皇夜向甘泉路婉聲華思生古愁
醉拂塵鷓鴣獨歸去

聽亦憐真給事中彈箏引

長楊侍中貂蟬客手援秦絲汎輕雪小響低徊入素商

颯颯涼風下秋葉遊絲欲睡鶯呼起珊瑚曉碎
楊枝紫隴水幽幽小鴈寒竹暗湘娥怨秋雨
少年書客多情苦春思空濛迷處所風簾一
夕感君彈欲寄相思隔千里

雲州行

雲州域西

一作北

草青青落日欲沒光晶熒輜車毳帳紛簇

簇平原入夜涼風生馳鳴馬嘶人不行牧兒長笛吹月
明我生何為困奔走况乃北度烏桓城有家有
家隔江水三年不歸憂弟兄妻兒寄書念我遠問我寢食仍良

能草堂步履喜無恙石田春盡今已耕子規何事啼向
我逡巡行亦將南征明朝騎馬登道路世事浩渺誰能
徵

八月十三夜漫成寄江南友人

草井度涼螢風簾燭燄清長秋為客日明月搖衣聲歸
夢頻宵見愁心徹曉生故園有叢菊早晚掇秋英

送王文學比玉教授宜興

諸生新進士文學舊科名經訓知能事才華況老成高

文驚吏部小選得權衡白髮南州士因君竟被榮

送崔弘道尹沅江

幾日沅江去今朝別遠人吏曹多任法令尹亦勤民峽
樹烟中遠湘波雨後新野人懷善政露冕看行春

奉和王治書紙燈韻

香繭凝脂薄金刀逐意妍輕清籠絳蠟晃漾映羅箋巧
異雲藍瑩光華若火然好花迎宿藹初旭眩晴烟製陋
秦宮炬工慙漢綺蓮映空珠網密照夜綠璣圓皎轉虹

垂浦輝分宿麗躔芳能欺霧縠燈欲暈冰筵春淨波如
感雲輕雨未懸東風愁翦翦華屋鎖神仙

次宋編修顯夫南陌詩四十韻

麗質過邯鄲春風直幾錢送情憐眼艷凝竚覺身偏霞
澹斜侵雁雲輕巧襯蟬芳金搖翠勒暖玉藉絨韉臉媚
風初信睂彎月未弦綠深芳草雨紅綻碧桃天却扇羞
花落褰裳妒酒翻關心時淺笑憶別自微言條脫濃香
暖中纓膩粉斑幽期祇寄約私語每防閑田木須連理

吳梅易引涎襦長腰並柳襪小步移蓮枕障熏沈水屏
圍畫遠山體輕嫌蔽膝指嫩瑩驅環悵蕩元非醉朦騰
不為眠繡盤花猗儺錦就字洄聯鎖合沈魚夕第閒少
鴈寒美人何杳杳良夜獨漫漫乍見都疑夢相逢信契
仙憐才多婉婉倚態轉翩妍壁月紅牕外銀河碧樹邊
慢輕雲影動簾靜浪紋懸裙薄綃長皺裊重錦未薦妝
臺宜向日舞袖欲隨烟難舌遙聞韻程肩厭授餐深衣
留唾碧繫帛表心丹只憶愁腸斷寧知別緒牽寶釵分

鳳翼鈿合寄龍團紅豆膏凝篋文鵷繡作繁淒迷千日
酒惆悵五雲軒楚女窺牆日文園病渴年合歡連組帶
解珮雜芳荃纓斷風前燭香偷別後筵額黃紅粉澹淚
顆紺珠鮮苔迹和塵印花陰帶露穿時時傷往事故故
寄新篇人去愁千疊心傷恨萬端蝶晴隨絮遠鷺曉怨
春殘夢好心多感情深意已傳縈蕪空滿地欲贈思依
然

八月十五夜懷山中友人

烟消天末夜，腫臃溶漾銀河望。欲空長憶山中，共明月
獨憐都下。見秋風羽林警衛，紛如織。龍虎公屯，勢更雄。
遠客不眠愁欲絕，起看鵲露光中。

次韻楊編修仲禮奉引法駕之作

清遊小隊肅都城，夾騎黃麾拂曉晴。仙島雲霞扶日上，
紫垣星宿屬天行。龍旗却傍重輪駐，雉扇徐分九彩明。
共喜太平多扈從，願因作頌著休聲。

送權講主

聞師採藥向江南，禪衲親持使者驂。
鹿獻野花來寶地，龍偷海藏出珠龕。
丹砂傍石分秋水，靈草和烟度嶂嵐。
此日歸來進天府，芝雲朮露曉曇曇。

次謝鍊師簡嘯碧真人奕棋韻

萬壽宮前鶴髮翁，籜冠千葉戴芙蓉。
經行巖洞騎黃鶴，叱咤風霆起白龍。
世外奕秋誰復見，山中玉質記曾逢。
秋深琪樹連雲碧，悵望丹霞第幾重。

過髮冠女仙廟

天上香雲擁碧鬟
山中大藥駐紅顏
千年仙去空塵土
半夜月明聞珮環
芳草不知前度綠
古苔渾似舊袍斑
自憐軒冕馳驅者
目送浮雲不得閒

過鹿皮子小玄暢樓

隱君昔向金華住
坐愛雙溪八詠樓
別起危檐更蕭爽
未應前牖獨風流
空山明月定誰好
野水閒雲亦自秋
他日相從問清靜
便須乘興到林丘

對酒感懷漫賦

半醉簪花出杏園
玉驄嘶過五門前
豈無綠酒酬佳節
坐對青山憶去年
蛺蝶有情嫌我懶
名花底事向誰憐
嬌娘莫惜羅裙浣
看取腰肢醉後妍

送趙鵬舉之西臺掾

掾曹騎馬赴西臺
迢遞關河幾日回
秋草自隨人去遠
夕陽長共鴈飛來
亂雲荒驛迷秦樹
落葉殘碑有漢苔
最憶年年寒食節
華筵誰向曲江開

青青淇園竹

青青淇園竹莫作樂中笛吹出長相思愁人頭髮白

定情篇

願作雲臺鏡團圓誓不虧朝朝綺牕裏相對畫蛾眉

古意

美人汲深井夜久井泉冷獨向明月中徘徊顧秋影

武林雜興

樓閣參差細雨簾櫳料峭輕寒人去空餘燕子春來休

倚闌干

宮詞二首

館娃誰比念奴嬌暖玉團香膩粉消昨夜教坊傳聖旨
梨園弟子屬雲韶

宮門烟柳映風蒲別殿交魚給傳符太液池邊下黃鵠
急宣立本畫新圖

採蓮曲

長歌短櫂滿前溪溪上鴛鴦對對飛莫向中流蕩雙槳
水波容易濕人衣

相逢曲

郎騎白馬妾駕車
妾車轆轤郎馬嘶
相逢且莫相憐愛
妾家只在五門西

送葉審思北上二首

曉際風霆上紫壇
夜吹簫管向人間
月明孤鶴三千里
知過吳山與越山

領得除書好便歸
故山芝朮已應肥
神仙政苦多官府
不及閒雲自在飛

李貫道

貫道字師曾裕子至正甲午登進士第授將仕郎饒州路鄱陽縣丞未上用薦者改詹事院掾史尋扈駕清暑上京卒所著有敝帚編等集

三星行贈李高

三星射戶金光芒梧桐碧樹棲鸞凰
牕前整夜合歡帶繡羅宛轉成鴛鴦
雲屏霧帳輕於縠珍簟攔斑織湘竹
美人振佩江上來粉面團團照紅玉
桃腮杏臉天上嬌

暖香膩色春妖嬈
關雎窈窕泛流徽
子夜國香春夢遙
重城漏斷難聲裏
曙色瞳矐照臆綺
暑天夜短君莫愁
百歲歡娛今夕始

元詩選三集卷六

欽定四庫全書

元詩選三集卷七

庶吉士顧嗣立編

王都中本齋集

都中字元俞一字邦翰福寧州人父積翁宋寶
章閣學士降元授江西行省參政宣諭日本遇
害海上都中甫七歲元世祖給驛券南還賜平
江田八十畝宅一區年十七授平江路總管府
治中秩滿除浙東道宣慰副使遷荊湖北道武

宗詔更鈔法除江淮泉貨監歷郴州饒州兩路
總管以內憂去服闋除兩浙都轉運鹽使擢福
建閩海道肅政廉訪使歷遷福建浙東廣東三
道宣慰使都元帥元統初命以正奉大夫行戶
部尚書兩淮都轉運鹽使尋拜河南行省參知
政事申道疾作南歸詔即其家拜江浙行省參
知政事至正元年卒贈昭文館大學士謚清獻
元俞幼留京師從許文正公學知所趨嚮尤致

力於根本之學自號曰本齋有詩集三卷事母
至孝翰林國史院編修官章嘉撰本齋王公孝
感白華圖傳云公母張氏諱普貴自號無為至
元甲申公父閏國忠愍公銜命使日本沒於難
時母年三十公甫七歲留侍京師訃聞即以貞
節自誓祝髮於京之淨垢寺為尼出主平江陽
山妙淨寺道行冰雪尋奉璽書護持錫號宏宗
圓明佛日大師住山幾四十年至治壬戌趺坐

而逝公聞永嘉心樂周真師有道延至家庭設
黃籙以展孝思越十有四日像設之筵瓶簪丹
茶兩旬浹矣其花半萎中有一萼天然融結狀
類桃實非華非果玉質穀章宛分三脈日漸以
腴燭之內外映徹如淨琉璃駭乎優曇鉢之一
現也詩之白華豈即此耶元俞因繪白華圖一
時張翥李士行龔璠湯彌昌王壽行釋大訢諸
公俱有題詠按章嘉傳稱元俞母張氏父積翁

殉國時元俞已七歲矣且留侍京師而元史謂
生三歲即以恩授從仕郎南劍路順昌尹七歲
從其母葉訴闕下種種舛錯至以張為葉尤可
笑也

登蘇峰

平生癖好登仙山紫翠縹緲三岫間公餘杖策時一到
塵埃蕩掃天風寒蒼松獨立老龍出身到洞天人不知
遙看玉殿底虛皇香霧丹霞遶瓊室翠濤三吸賦玄言

何必研朱點周易仙人舅氏空遺宅樓閣玲瓏倚蒼石
好是凭闌對月時一江倒浸千峯碧

武夷山

青峯玉鑿芙蓉開上有控鶴仙人來憐憐曾孫望霖雨
手寫深雲沃焦土仙人如今在何許我欲從之一千古
握取青雲行九州長使人間無旱憂

遊勝會寺

寺古唐朝立山藏一逕幽木生靈壽異花發蕙蘭稠淪

茗香浮齒簪梅雪滿頭公餘尋勝會此地約重遊

和彬卿北湖

訪古空遺迹又魚舊有亭苔封荒逕綠草沒斷碑青老
樹根橫水寒蘆葉滿汀漁歌何處起倦客倚欄聽

和李源仲九日

我愛秋容淡東籬鵲鵲暉黃花依舊發白髮幾時歸明
月輝官舍清風爽客衣今年好光景長歎故人稀

題如鏡山林清氣集

不作西湖夢歸吳愜素知山林有清氣泉石到新詩
花落曉風靜鳥啼春日遲孤吟最佳處猶在定回時

題海會寺

四圍蔥翠列奇峯碧瓦朱甍護象龍殿角風過鈴自語
山腰雲起洞長封泉清似鏡耳堪洗路曲如腸步莫從
驛馬倦人歸道遠欲公禪榻寄塵踪

依紫崖韻和彬卿

捐軀難報聖明君補拙惟將一寸勤為政但當求實効

勸農何敢具虛文夜來江上一犁雨曉起山前萬鋪雲
願得歲豐民物阜素餐猶可度朝暉

登東山寺

古寺峇崑隱翠微松陰行盡見朱扉巖花識面遠迎笑
野鳥忘機近不飛相國書堂今寂寂山僧法座久巍巍
凭闌欲問當時事白鷺無言立釣磯

和彬卿北湖

雲容水態若為模髣髴風光似鑑湖橋跨滄浪瀉寒玉

舟橫沁碧滾明珠且斟醺醖醉鸚鵡應用娉婷唱鷓鴣
席上嘉賓賢雪牖高吟原不讓三蘇

題又魚亭

昌黎曾此賦又魚披棘尋碑考郡圖重築草亭存古意
雙浮畫舫做西湖激輪為磨供官費隔水分塘笑我愚
寄語後來賢太守相承無似此慵迂

和雪牖永興山行

公馳魚夜役兵夫軋軋輕輿穩勝車山險似人人更險

星疎如我我猶疎心持坦蕩無留礙路躡崎嶇信所如
行路古來難若此相逢何必問其初

督役江行和雲牖韻

督役賢能不用刑飄然東下似揚舳一江雪浪翻銀屋
兩岸烟巒立翠屏白鷺對人神亦爽烏鷄入水氣猶腥
鯨舟指日功成就萬斛乘風駕渺溟

和彬卿江行即景

怪石奇峯疊削成江行渾若泛仙瀛崖松偃蹇蛇龍勢

瀧浪飛翻玉屑輕，色入懷衣袂冷。溪光照影骨毛清，
更開放溜泊榔口。明月清風更有情。

登南塢

自笑登臨脚力微也，攜藜杖叩山扉。禪僧入定渾無語，
野鳥知還亦倦飛。一塢近天鈴自語，千峯蘸水石空巍。
何當快整東歸櫂，帆飽東風數過磯。

武夷山二絕

層崖疊空翠，臺閣倚雲開。靈函鎖仙蛻，神物護蓬萊。

清溪照眉髮，擢舉揚清波。何當結茅屋，時與神仙過。

白鷺

白鷺白如雪，照影臨沙磧。翻被魚先見，終日不得食。

鷓鴣

鷓鴣黑如鬼，捕魚入水底。搜抉雖無遺，吞吐良可鄙。

瓊花

六丈老人花滿頭，一枝流落在揚州。不知誰是我花手。

只到而今香未收。

六丈即今
六丈市云

和彬卿登山

遠山蔥翠近樓藍
碧絮飛雲自往還
獨倚長松吟不盡
恍然身在畫圖間

游北湖

畫舟搖曳泛空明
滿酌流霞倒玉觥
山鳥亦知游樂意
夕陽高處兩三聲

書懷二絕

一心常欲洗民冤
清白爐烟可付天
但愧才疎為政拙

只宜及早賦歸田

蘇仙孝感動鄉閭
橘井千年事若符
時上仙壇壇上望
白雲飛處是姑蘇

王畛詩附

畛字季野都中之子
官至成都路判官
至正間與弟哇流寓吳中
與陳叔方鄭明德並以文行著於時

早春十詠

春日流和熙朱光射屋角晶熒動几案焜耀穿簾幕淑
氣襲人溫輕寒側衣薄晴牕坐對久盡背真意樂

東風生庭隅拂拂翻衣浪仁及紅綻柯德布綠回望芳
情達金閨誦聲遞書幌池塘溢波瀾柔條欣駘蕩

江梅獨清高不與花爭發自是水雪姿豈受鉛華奪故
來風雪底玉人相感頰照水昏黃時孤標更超越

依依垂楊柳青眼窺陽春年年郵亭路攀折送行人臨
風寒翠縷映日鎔黃金如何不自持飄揚逐芳塵

蹢躅先春雀風暖喧晴簷驚人鮮得食闕階無停瞻不
趨太倉中小腹恣屬厭高秋寒露下大水須深潛
春流溢芳塘倒影開天鏡漪漪綠生漣漾漾玉澄瑩閒
鷗可尋盟遊魚樂行泳清斯清濯纓鑑心鑑其定
鮮鮮牆根草春染千堆藍光凌青袍色夢入新詩譚戰
馬思塞北陽烏辭江南欣然鬱吾目生意性所耽
提壺勸客飲布穀催農耕農耕困耒耜客飲酣簫箏勞
逸分已定廢興時改更物生固如此天運還循行

朝來睡未足兩眼多眵昏春事已爛漫我懷獨渾渾
尾不可附虎舌誰能捫芳塵困涸轍北溟思鯨鯢
天公妙莫測百卉巧翦裁朱朱與白白脂粉如勻腮澤
沾無遺物燒却綠回芳瘡陰少成實涉山良乏材

自遣二首

江湖肆鯨鱣溝

闕

難容身人情不千日世事有兩心朝

暮有顯晦日月常升沈天道我欲問其理幽且深

生成無根蒂飄忽寄此身顧盼絕青眼相交少赤心

蘭棘溷發泥沙玉空沈乾坤信浩蕩滄溟千古深

放慵

愁到心常結事過心自涼幽憂漫成疾慵放且何妨
籠鶴聲難出牀龜息穩藏浮生付天地澄慮博山香

晚思

薰風向晚急吹動一身愁意合情終美心離事只休
烏衝殘日度雲逐暮天流今古無窮恨令人早白頭

王哇詩附

畦字季耕都中子

次韻答倪雲林錄似良夫

重過城南隅春風動經年物候倏易改飄泊念華顛江
干雨初歇草色凝娟娟聚首有親朋舉杯無管絃樽前
語別離但覺心茫然舊遊總塵埃今古孰後先攬衣陟
崇岡俯首臨澄淵修竹翳平林嘉樹藉庭延有書盈我
牀有琴橫我前卷舒貴所從鷗鷺何翩翩願言留清歡
日夕醉後眠

次韻呈愚菴禪師二首

竹逕初晴屐齒乾，忽聞仙佩下層巒。
多君有約同禪榻，老我無心整舊冠。
幾局文犀敦宿好，數杯浮蟻接清歡。
別來湖水添新綠，應理絲綸坐釣灘。

蘭若深居晝掩扉，任教湖海仰光輝。
牕前蕉綠兼雲潤，庭下榴紅映日晞。
石鼎香凝翻貝葉，竹爐湯沸煮山薇。
獨憐咫尺頻相過，時策青藜步月歸。

寄倪元鎮六首

至人無復事存亡睡足身猶在華陽何似江鄉老迂客
終朝散髮對爐香

鈎簾早起看華飛過雨修篁蔽竹扉近日身如野鷗狎
得魚逐浪竟忘歸

茅屋柴門少市人時看麋鹿走踈踈風前忽見飛花墮
想是山中又一春

洞庭月色夜蒼茫欲駕扁舟獨擅場為問林間倪外史
古今塵世幾興亡

種水耕雲不厭勤
林間著我作閒人
漁磯沙渚江洲上
極目天涯總是春

久矣維摩誤色空
愧無長翮遡晨風
空巖長笑一回首
又在扶桑東復東

謾興三絕呈良夫

淡烟輕雨濕青螺
面面青山拱樂窩
坐對一池春草綠
聯詩好客又相過

芍藥初開第一枝
翻階國色玉參差
當年記得平山下

花裏時將鳳管吹

呼童早起折茶蘼
插向銀瓶映酒卮
為愛春光晚猶媚
莫教風雨褪香肥

呂思誠仲實集

思誠字仲實平定州人母馮氏夢一丈夫烏巾
白襴衫紅鞵束帶趨而揖曰我文昌星也及悟
思誠生目有神光見者異之及長從蕭軒學治
經擢泰定元年進士第授景州蓁縣尹累擢翰

林國史院編修進國子司業拜監察御史出僉
廣西浙西二道廉訪司事復召為司業累陞侍
御史遷河東廉訪使未幾召為集賢侍講學士
兼國子祭酒出為湖北廉訪使入拜中書參知
政事三任中書左丞累拜翰林集賢學士兼國
子祭酒左遷湖廣行省左丞復召為中書左丞
移光祿大夫大司農俄得疾以至正十七年三
月十七日卒年六十五諡忠肅有文集若干卷

兩漢通紀若干卷仲實文章政事皆過人遠甚
而廉潔不污家甚貧其未顯時一日晨炊不繼
欲攜布袍質米于人室氏有吝色因戲作一詩
曰曲却春衫辦早厨老妻何必更躊躇瓶中有
醋堪燒菜囊內無錢莫買魚不敢妄為些子事
只因曾讀數行書嚴霜烈日皆經過次第春風
到草廬後果登第

嘉山靈源祠

山岌岌兮勢若揭水煦煦兮深黑色晉公子兮凜而烈
坎坎兮擊鼓傿傿兮屢舞八珍兮几清肴核兮維旅水
之涯兮山之下駕雲旗兮乘雷車倏從電影兮若有所
覩

題政平樓

灘江江上古昭州一帶孤城有此樓雲護山容簷外立
月將波影檻前浮朝廷只許平持獄官府終當詳讞囚
筆底判花生死地百年雨露一時休

桂林八景

堯山冬雪

堯山絕秀嶺南天
雪壓林巒飄素烟
高倚暮雲屏掩翠
半消晴日玉開田
驛梅逢臘巖前發
羽檄衝寒徼外傳
何日樓頭閒拄笏
兩階舞罷對瓊筵

舜洞秋風

西風颯颯桂林秋
萬疊雲山舜洞幽
曉氣沿崖秋色冷
涼飈吹樹桂香浮
輕搖斑竹江頭恨
遠送蒼梧天外愁

一旦薰風隨律變露華山色滿南州

西峰晚照

西峯西向桂林西數點晴雲落照低絕嶽倚空排寶戟
斜暉轉樹繞雌蜺錦紋零亂霞前映翠影參差雨後迷
還似峴山詩酒客醉來聽唱白銅鞮

東渡春瀾

東門東渡柳青青雨後晴瀾春水生月影流來波影碧
浪花飛起雪花輕連漪忽動魚翻藻浩蕩初開鳧唼萍

終日靜觀還有得層層天色一舟橫

訾洲烟雨

分合灘頭見訾洲訾洲烟雨水雲秋
空濛細縠沙頭籟散亂跳珠波面浮
鷗鷺飛翔來上立蛟龍騰躍此中浮
蓑衣蒻笠垂楊外時有漁人橫釣舟

桂嶺晴嵐

桂嶺崇崇插絳霄晴嵐浮動翠雲飄
峰巒碧潤輕翻縠巖壑精熒深染綃
晚靄忽開高窅兀餘輝斜抹蔚苔莨

緩行鳥徑衣裳濕莫說梅花萬里遙

青碧上方

獻花隨喜上方行雲影天光入戶庭
江水遠翻僧眼碧山峰輕染佛頭青
恒河莫訝沙無數驚嶺休驚嶽有靈
色界不空因相起貝多葉上寫蓮經

棲霞真境

七星山畔列松杉羽服棲霞雪一龕人
自世間來世外洞從山北出山南日邊
五色迷晴靄頂上三華紫夕嵐

仙去儒遊真境在一輪明月影寒潭

遊嘉山

不到嘉山十五年神林祠宇兩悠然鵝溪鵝泛溪頭月
龍井龍蟠井底天霖雨未能酬素志烟霞且得遂高眠
一觴一咏歸來晚朋友相聯若有緣

松風書院

夕陽林樹欲棲鴉偶到東山處士家松子嶺高嵐氣潤
幽軒開碧落松花

于文傳仁里漫槩

文傳字壽道號止齋平江吳人父雷龍鄉貢進士先世以武弁入官而力教其子以文易武故雷龍兩舉進士生文傳乃名今名以期之用舉者為吳及金壇兩縣學教諭饒州慈湖書院山長延祐科舉法行首中江浙鄉貢明年會試乙科授同知昌國州事累遷長洲烏程兩縣尹陞婺源吳江兩知州至正三年召修宋史書成擢

集賢待制尋以嘉議大夫禮部尚書致仕卒年七十八所著有仁里漫藁壽道為文務雅正不事浮藻尤長于政事其治行往往為諸州縣最有古循吏之風韓伯高廉訪浙西作烏程謠以紀其績初壽道登第後一夕夢入選挂名為長吳正官覺而笑曰我吳人安得作長吳二縣正官已而果知長洲縣復知吳江州適與夢符壽道以吳人而兩任為本路之官一時以為希遇

云

至順四年四月九日同王叔能柳道傳錢翼之胡
古愚遊天平山次古愚韻

蒼壁屯雲戟衛森白雲入戶袞衣臨千章喬木祇如故
一尺流泉不在深賸有桑麻居杜曲豈無觴咏集山陰
登高却省曾遊處短髮搔餘不耐簪

自天平遊靈巖次胡古愚韻

兩峯闔門西突兀頽衆丘昔年歌舞地潺湲水空流歸

然白雲祠祀事久益修尚書獻納後聊復吳中遊東陽
二佳士並驅馭玉蚪相從泉石間共賞花竹幽振步極
玄覽萬象輸吟眸笑語落空谷轉覺吾生浮登高固能
賦一洗千古愁日暮微風發山氣涼如秋老禪亦好事
歎曲邀人留清泉出巖竇濁醪過牆頭吾曹亦何幸去
去同仙舟

自靈巖登天平山次柳道傳韻

范公命世才志欲清禹甸高名冠禮闈直道行諫院氣

節凜霜柏精神爛巖電常懷天下憂每恨黨錮傳買田
贍貧族貶恩責幽竈致君宜無術不采羞自薦身未安
朝廷勲已樹方面稍虧一簣成俄感兩楹奠相業貽後
昆源深流益衍莪莪天平山先塋神所戀靈旂泝天風
闕提百夫牽堂高廟貌尊寺近法輪轉簾靜香更清庭
幽香逾蒨侯邦秩春祀闢戶丹青絢繫牲有豐碑孰敢
易以麵忠孝結人心異代民不倦茲遊及初夏喬木烏
聲轉遺構指吳宮往事鄙勾踐至今十載後紅膏汙蒼

巖青松自高卧日出露光泣衣從空翠沾杯帶流霞噉
溪聲碎珠玉勢若疾飛霰肩輿去如飛側還不容眄人
歸華表鶴石化洞中燕惟有白雲居不知陵谷變一亭
順流泉頗覺遊覽便龍門快先登卓筆喜遙見山形如
呆愚迴合護臺殿一宿贊公房蓮花催曉箭芳題勒巖
壁清飲却歌扇平生予長遊奚暇論封禪紀行詩固奇
屬和語多諺真同雩詠歸寧狂不為狷識琴誰似邕知
玉莫如卞

題水村圖

桑梓未能忘楚甸琴書已久住吳門
悠悠江海風烟隔知是夕陽何處村

敬題范文正公所書伯夷頌卷尾

孤竹身為百世師范公手染退之辭
不知青社揮毫日得似天章論道時

王艮止止齋橐

艮止字善紹興諸暨人少受業郡庠篤行勵學

淮東廉訪司辟為書吏考滿調廬州錄事判官
淮東宣慰司辟為令史再調峽州路總管府知
事又辟江浙行省掾史歷建德縣尹除兩浙都
轉運鹽使司經歷改海道漕運都萬戶府經歷
遷江浙行省檢校官除江西行省左右司員外
郎在任歲餘以中憲大夫淮東道宣慰副使致
仕至正八年卒年七十一止善弱冠遊錢塘與
浦城楊仲弘鄜州劉師魯友善論詩務取法古

人之雄渾而脫去近世萎靡之習間挾其所為
文登諸大老之門最為年隆山胡汲仲穆仲趙
子昂鄧善之所賞識拂衣歸田後家食者五年
扁所居曰止止齋仍自號鷗游子以見其志云
追和唐詢華亭十咏

顧亭林

顧公讀書處乃是林塘居竹樹久凋謝紅翠何稀疏
魚鳥非昔遊風烟尚遺墟身滅名不朽流聞千載餘

寒穴泉

石竇出寒冽湛湛天影平處靜能自潔不汲元無聲飲
之煩熱除鑑此毛骨清寄語沈酣者一啜當解醒

吳王獵場

孫氏保澤國上馬操金戈獲禽非其志豈必施虞羅霸
氣凌秋旻精采一何多俯仰迹已陳禾麻被平坡

柘湖

湖瞰平林外波搖斷崖濱柘山應孕秀秦女乃能神剪

紙微靈貺乘槎覓要津
波頭風正惡愁殺採菱人

秦皇馳道

秦皇混六合荒誕殄厥修
求仙望蓬萊驅車乃東遊
道斃雜鮑魚腥風夕彌留
徐福竟不還何處營丹丘

陸瑁養魚池

華亭郭西偏云是陸瑁居
宅墓了不存況此池中魚
纖鱗依藻荇採取無復餘
皇風反淳古數罟或可除

華亭谷

邈邈華亭谷遠帶松江流亦有賞心人於焉放扁舟風
將綵帆舉身與元氣浮拍手招鷗夷傲晚三千秋

陸機宅

士衡多奇才儒術何困深少年作文賦吐秀含規箴遭
讒卒遇禍白日雲為陰一聞華亭鶴遺趾尚可尋

昆山

茲山孕奇秀因人得佳名人去山亦枯竹柏藏秋聲寒
泉湛空碧石穴儼不傾焉知千載後豈無君子生

三女岡

傳聞三女岡不誌三女名蕭蕭白楊盡靡靡芳草生西
施殆其國此恨尚未平碧血化游鱗猶當照吳城

過花邨將臺懷答刺罕丞相

檻外長江切岸來曾陪丞相駐崇臺旄頭不動軍容肅
鷁首齊飛將令催虎兕蕭條荒壘在魚龍寂寞暮潮回
美人不見空搔首更聽雲間白鴈哀

次韻風月亭留題

重來揚子故人遠滿目風烟如隔生我遊無往不適意
世故何者能關情清宵晏坐山月上白日緩步江風輕
扁舟欲發更留滯隔岸杳杳來鐘聲

簡王君實僉事

顧瞻幽薊三千里局促舟航十二時篙拄岸沙移寸寸
霧迷朝雨下絲絲白頭應笑馮唐老青眼幾成阮籍悲
能向江邊迂憲節持杯來赴野人期

黃河道中

荒荒大野蕪天遠渾渾長河與海通雲暗春城榆莢雨
浪翻沙岸鯉魚風簡書上計千艘集玉帛來朝九域同
獻納願陪青瑣議衰遲已是白頭翁

黃樓

山河壯麗雄三楚人物風流憶二蘇自古必爭形勝地
當年曾屈霸王圖呂梁東下波濤險芒碭西來島嶼孤
試上黃樓酹明月百金取酒未為迂

歌風臺

淮南不軌天威及清蹕西還過沛中樂作酒酣鄉思激
雲飛風起霸心雄龍光已逐寒烟散烏篆空餘碧蘚蒙
極目荒臺增感慨冥鴻矯矯入秋空

發瓜州

一別蕪城逾十載重來魚鳥亦相親童童碧樹添新冢
段段青山似故人把鏡未須驚白髮持杯猶得及芳春
却將此日思前日只覺今身是後身

贈柯敬仲博士

與子浮沈三十載歸來文采更風流虛名聊爾或見錄
尤物移人何足留說劍談玄皆外慕買田築室是良謀
眼花耳熱爭意氣泯滅無聞同一漚

和敬仲韻

憶子曾陪翠輦過朔風海子起層波上方授衣黑貂鼠
大官進膳金頭鶯此日此時甘放曠某山某水且婆娑
但願年豐飽喫飯擊壤細和堯民歌

題江風山月亭

往日扁舟渡揚子水榭風軒吾舊遊
天籟動波蛟窟夜雲根倒影兔華秋
嵐光漠漠浮京口樹色依依到石頭
試與題詩分物色玉簫吹月上揚州

五洩山二首

七十二峯水碧白雲半掩招提清
晝焚香燕坐綠陰深處烏啼


山骨層層刻畫溪流曲曲縈回巖際玉龍歆
雪天風吹落瑤臺

題楊補之雪梅卷

水邊石上竹林西
香影亭前放鶴時
今見畫圖疑是夢
南枝雪壓得春遲

錢唐雨中招申屠彥德

春雲拂地雨淅淅
戶外屨空生綠苔
朝天門外樓依水
好棹小舟乘興來



元詩選三集卷七